

黃氏逸書考



黃氏通考



漢學堂經解

逸書考

虞翻易注

甘泉黃奭學

上經

乾

初九潛龍勿用

爻辭周公所作

春秋左傳序疏

九三君子終日乾乾夕惕若厲无咎

謂陽息至三二變成離離爲日坤爲夕

集解

已下集解依雅雨

堂本元文校正

民國甲戌

虞翻易注

一江都朱氏

九五飛龍在天利見大人

謂四已變則五體離離爲飛五在天故飛
龍在天利見大人也謂若庖犧觀象於天
造作八卦備物致用以利天下故曰飛龍
在天天之所利見也集解

雲行雨施品物流行

已成既濟上坎爲雲下坎爲雨故雲行雨
施乾以雲雨流坤之形萬物化成故曰品

物流形也

集解

君子以自強不息

君子謂三乾健故強天一日一夜過周一

度故自強不息老子曰自勝者強

集解

終日乾乾反復道也

至三體復故反復道謂否泰反其類也

集解

樂則行之憂則違之

陽出初震爲樂爲行故樂則行之坤死稱

憂隱在坤中遯世元悶故憂則違之也

集解

確乎其不可拔潛龍也

確剛貌也乾剛潛初坤亂於上君子弗用

隱在下位確乎難拔潛龍之志也

集解

九二曰見龍在田利見大人何謂也子曰龍

德而正中者也

中下之中二非陽位故明言能正中也

集解

易曰見龍在田利見大人君德也

陽始觸陰當升五爲君時舍於二宜利天

下直方而大德無不利明言君德地數始

二故稱易曰

集解

案釋文虞翻注參同契云易字從日下月

九三曰君子終日乾乾夕惕若厲无咎何謂也子曰君子進德脩業

乾爲德坤爲業以乾迎坤謂爲進德脩業

集解

是故居上位而不驕

天道三才一乾而以至三乾成故爲上夕

惕若厲故不驕也

集解

在下位而不憂

下位謂初隱於初憂則違之故不憂

集解

九五曰飛龍在天利見大人何謂也子曰同聲相應

謂震巽也庖犧觀變而放八卦雷風相薄

故相應也

集解

同氣相求

謂艮兌山澤通氣故相求也

集解

水流溼火就燥

離上而坎下水火不相射

集解

雲從龍

乾爲龍雲生天故從龍也

集解

風從虎

坤爲虎風生地故從虎也

集解

聖人作而萬物覩

覩見也聖人則庖犧合德乾五造作八卦

以通神明之德以類萬物之情五動成離

日出照物皆相見故曰聖人作而萬物覩

也

集解

則各從其類也

方以類聚物以羣分乾道變化各正性命

觸類而長故各從其類

集解

見龍在田時舍也

二非王位時暫舍也

集解

乾元者始而亨者也

乾始開通以陽通陰故始通

集解

乾始而以美利利天下

美利謂雲行雨施品物流形故利天下也

集解

不言所利大矣哉

天何言哉四時行焉百物生焉故利者大

也

集解

君子以成德爲行日可見之行也

謂初乾稱君子陽出成爲上德

案疑作陽出上爲成

德

雲行雨施則成離日新之謂上

案上疑作盛

德故日可見之行

集解

君子學以聚之問以辯之

謂二陽在二兌爲口震爲言爲講論坤爲

文故學以聚之問以辯之兌象君子以朋

友講習

集解

寬以居之仁以行之

震爲寬仁爲行謂居寬行仁德博而化也

集解

易曰見龍在田利見大人君德也

重言君德者大人善世不伐信有君德後

天而奉天時故詳言之

集解

九三重剛而不中

學易記引注同
周易象旨決錄

又龍過

以乾接乾故重剛位非二五故不中也

集解

或之者疑之也

非其位故疑之也

集解

與鬼神合其吉凶

謂乾神合吉坤鬼合凶以乾之坤故與鬼

神合其吉凶

集解

先天而天弗違

乾爲天爲先大人在乾五乾五之坤五天

象在先故先天而天弗違

集解

後天而奉天時

奉承行乾三之坤初

案疑作乾二之坤二

成震震爲

後也震春兌秋坎冬離夏四時象具故後

天而奉天時謂承天時行順也

集解

坤

坤元亨利牝馬之貞

謂陰極陽生乾流坤形坤含光大凝乾之

元終於坤亥出乾初子品物咸亨故元亨

也坤爲牝震爲馬初動得正故利牝馬之

貞矣

集解

西南得朋乃與類行

謂陽得其類月朔至望從震至乾與時偕

行故乃與類行

集解

東北喪朋乃終有慶

陽喪滅坤坤終復生謂月三日震象出庚

故乃終有慶此指說易道陰陽消息之大

要也謂陽月三日變而成震出庚至月八

日成兌見丁庚西丁南故西南得朋謂二

陽爲朋故兌君子以朋友講習文言曰敬
義立而德不孤彖曰乃與類行二十九日
消乙入坤滅藏於癸乙東癸北故東北喪
朋謂之以坤滅乾坤爲喪故也馬君云孟
秋之月陰氣始著而坤之位同類相得故
西南得朋孟春之月陽氣始著陰始從陽
失其黨類故東北喪朋失之甚矣而荀君
以爲陰起於午至申三陰得坤一體故曰
西南得朋陽起於子至寅三陽喪坤一體

故東北喪朋就如荀說從午至申經當言
南西得朋子至寅當言北東喪朋以乾變
坤而言喪朋經以乾卦爲喪耶此何異於
馬也

集解 象旨引月三日變
成震至東北喪朋稍節

安貞之吉

坤道至靜故安復初得正故貞吉

集解

應地无疆

震爲應陽正於初以承坤陰地道應故應

地无疆

集解